

dann frey, rundt vnnd hell die Jrrthumb verworffen vnnd verdampt, die der Göttlichen warheit zuwider, wie sie dann sehen, das wir in diser vnser widerholten Bekanntnuß vnser Glaubens gethon vnnd nicht allein^c mit Namen, sonder mit deutlicher Erklärang alle die Jrrthumb verworffen vnd verdampt, die sie vns vnnd vnserer Kirchen vnbillich vnd mit vngrund zugemessen, so mögen sie dergleichen thun vnnd die Jrrthumb außtruckentlich verwerffen, die wir hieuer erzelt vnnd nicht auff sie erdichtet, sonder mit jren eignen Worten vnd in dem Verstandt, wie sie von jnen gemeint vnd geschriben, dargethon.

Auff was maß die Wirtenber-[254:]gische Theologen den Zwinglianern den friden anbieten.

Alßdann möcht man leichtlich zur Christlichen einigkeit widerumb kommen, das wir einhellig [254:] glaubten vnd bekenneten, das Christus der Herr, nach seiner menschlichen Natur mit dem Son Gottes persönlich vereinigt vnd zur Rechten der Maiestet Gottes gesetzt, persönlich vnd warhafftig nach seiner Menschheit vmb seiner persönlichen vereinigung willen auff Erden bey vns ohn alles auff- vnd abfahren warhafftig gegenwertig, vermög seiner Stiftung vns mit Brot vnd Wein sein Leib vnd ^dBlüt außtheile^d, den Würdigen vnd Gleubigen zum Trost vnd Leben, den Vnwürdigen vnd Vngleubigen aber zum Gericht, auff weise vnd wege, die seiner Göttlichen Maiestet allein bewust, von wölchem wir mit keinem Menschen Disputieren noch Zancken wöllen, dann sie ist menschlicher Verstandt vnd der Vernunft vnbegreiflich, sonder soll vnd muß allein mit dem glauben im Wort Gottes gefasset sein, der Allmechtig vnd warhafftig ist vnd was er verspricht halten kan vnd auch gwißlich helt, dem nichts vnmöglich ist.

Da nun vnser Gegentheil, die heimliche vnd offentliche Zwinglianer, sollichs mit vns auffrichtig vnd redlich, wie Christlichen Lehrern wol anstehet, mit Mund vnnd Hertz bekennen wöllen, so ist der sach durch die Gnad Gottes schon geholffen vnnd wöllen wir vmb Christlicher lieb vnnd Einigkeit willen jnen gern vor Gott vnd der Welt verzeihen, was vns vngütiglich vnnd mit vngrundt von jnen ist zugelegt worden. Wöllen sie aber solches nicht thun, sonder sich diser vnser Christlichen Augspurgischer Confessionsverwandten, einhelliger, warhafftigen vnd Gottseligen Bekanntnuß widersetzen, [255:] so wöllen wir hiemit vnser entliche Meinung erkläret vnd vor der gantzen Christenheit bezeugt haben, das wir mit jnen nimmermehr einig sein können noch wöllen, vnd demnach an disem ergerlichen vnd gantz schädlichen Zwispalt, auch an allem vnwiderbringlichem Schaden vnnd verderben, so beides bey der Kirchen vnnd Policey bißher auß disem Jrrthumb erfolgt vnd noch künfftiglich entstehn möcht, kein Schuldt tragen vnd also nach der Lehr S. Pauli sie fahren lassen vnd das Vrtheil Gott vnnd seiner Kirchen heimgesetzt haben.

^c allen: B.

^{d-d} Blüt warhafftig außtheile: B.